

न्यूं सुण कै बाहूमण राज्जी कोन्यां होए । बोल्ले, “म्हाराज! पहल्यां जो रूप देख्या था उसमें नरोगता थी अर बनावट भी ना थी । पर ईब तै यो रूप बनावट नै घेर राख्या सै । ईब ओ रूप कोन्यां जो पहल्यां था ।” राज्जा इस जुआब नै सुण कै हैरान होया । बोल्या, “पर मेरा सरीर तै ओ-ए सै । फेर थम ईसी बात क्यूकर कहो सो?”

“ईब थारा सरीर बेमारियां का घर हो लिया सै । जै अकीन ना आता हो तै थम माड़ी वार पाछे आपै-ए देख लियो । सच्चाई का बेरा पाट ज्यागा ।”

राज्जा नै बाहूमणां की बात्तां पै कती इतबार कोन्यां आया । फेर भी भित्तर-ए-भित्तर सोच्ची-माड़ी वार देख ल्युं । इसमें मेरा के जा सै ? राज्जा बोल-बाला बैठ गया । माड़ी वार पाछे राजा नै आपणे हाथ पां देक्खे तै सरम की मारी उसका सिर तले नै हो गया । सारा सरीर काला पड़ लिया था । सुथराई बेरा ना कित चाल्ली गई थी । राज्जा कै कोढ़ फूट्याया था । किस्से नै भी राज्जा के सरीर की इस हालत पै यकीन कोन्यां होवै था पर सच्चाई तै सच्चाई-ए थी । राज्जा नै आपणा सरीर आच्छी तरियां देख्या । यो ओ हे सरीर था जिसकी बड़ाई करते-करते दुनिया बौली हो लिया करै थी । आज उस्से सरीर में कै बांस आण लागी थी । कोए बड़ाई करण तै दूर, उसके कान्नी लखावै भी ना था । बाहूमण चले गये ।

सनत्कुमार नै जिब्बै-ए ग्यान होया अक, जिस सुथराई पै मन्नै घमण्ड था, आज वा हे बदलगी । जुकर यो सरीर भी मेरा कोन्यां होया न्यूं-ए या दुनिया भी कद्दे किस्से की ना होती । उसका भित्तरला उसनै बार-बार बिरागी बणन नै कैहू था ।

राज्जा नैं हाल्लो-हाल फैसला करूया— “ईब मन्नैं राज-पाट छोड़ कै साद्धू बणना सै”। उस नैं जिब्बै-ए राज छोड़ूया अर जंगल की राही पकड़ ली। ईब ओ साद्धू बण गया। उसके शरीर में रोग फैलता-ए चल्या गया। कष्ट भी बढ़ता-ए चल्या गया पर तिपस्या की राही तै ओ माड़ा सा भी कोन्यां डिग्या। आपणे धरम-ध्यान में लाग्या रहूया। उस नैं घणी-ए सिद्धी मिल गी। घमण्ड उस तै घणा दूर था। ना कद्दे उसनै बेमारियां की चिन्ता करी अर ना कद्दे आपणी सिद्धियां पै घमण्ड करूया। उसके तो बस एक-ए धुन थी—केवल ग्यान हासिल करणा सै।

देवां के राज्जा इन्दर नैं देख्या—सनत्कुमार मुनि करड़ी तिपस्या करण में लाग रे सैं। इन्दर नै फेर आपणी सभा में सनत्कुमार की तिपस्या की घणी-ए बढ़ाई करी। विजय अर वैजयन्त नाम के देवां नैं फेर सक करूया अर फेर सनत्कुमार का हितान लेण लिकड़ लिए।

दोन्नूं देवां नैं ईब कै बैद का भेस बणाया। सनत्कुमार मुनी धोरै पहोंचे। उन तै रोग का इलाज करण की कहण लागे। मुनी सनत्कुमार तो समता धारे बैठे थे। सरीर की उन नैं माड़ी सी भी परवा ना थी। बैद बार-बार कहण लागे तै वे बोल्ले, “सरीर के रोग दुआइयां तै ठीक हो सकैं सैं पर करमां के रोगां नैं दुआई के ठीक कर सकैं सै?” बैद चुप हो गे। उनके धोरै करमां के रोगां की दुआई थोड़े ए धरी थी जो मुनी जी तै दे देंदे?

बैदां की सिमझ में कुछ भी ना आया। मुनी जी नै आपणे मूं में आंगली दी। आंगली पै लाग्या थूक सनत्कुमार मुनी नैं आपणे सरीर पै लाया तै जादू-सा हो गया। ईब सरीर सोन्ने बरगा हो लिया था। बैद हैरान रहूगे। उनके मन के सुआलां का जुआब देंदे होए, मुनी जी कहण

लाग़े, “सरीर के रोग मेट्टण खात्तर तै मेरे धोरै धणी-ए सिद्धी सैं । पर सरीर तै मेरा कोए भी मतबल कोन्यां । यो बेमार रूहै अक ठीक रूहै, मन्नै के! मैं आत्मा पै चड्डा होया करमां का मैल धोणा चाहूं सूं । या तो मेरी कमअकली थी अक ईब ताई मैं सरीर के रूप नैं-ए देखदा रह्या ।”

मुनी जी की या बात सुण कै बैद सिमझ गे-यो मुनी आपणे बरतां तै डिगै कोन्यां ।

वे देवलोक में पहुँचे । इन्दर तै माफी मांगते होए बोल्ले, “म्हाराज! थमनै सनत्कुमार मुनी की बाबत जो कह्या था, ओ हम आपणी आंख्यां तै देख आए । साच्चै-ए उनकी जिनगी धन्न सै । ईब तै उनमें सरीर के रूप की इच्छा भी कोन्यां । वे तै आत्मा की सुथराई हासल करणा चाहवैं सैं । जै ईसी-ए तिपस्या वे करते रहे तै जरूर कामयाब होवेंगे ।”

ओड़ै जो ओर देव बैठे थे, उन नैं भी भित्तर-ए-भित्तर मुनी सनत्कुमार के साच्चै अर मजबूत बरतां की बडाई करी अर ओड़ै तै-ए उनकी बंदना करी ।



साधू का सतसंग

केकय देस का राज्जा था - परदेसी । उसके पड़ोसी देस कुणाल का राज्जा था - जितसतरु । दोनूं राज्जा आपस में गहरे अर करड़े ढब्बी थे । दोनुआं की सोच-सिमझ में अर उनके बिचारां में घणा-ए फरक था । राज्जा परदेसी जिदूदी अर घमण्डी था । धरम-करम नैं जाण्या ना करदा अक यो भी किम्मै चीज हो सै । जितसतरु सरल सुभा का अर सूधा माणस था । धरम के काम्मां में उसकी पूरी दिलचस्पी थी ।

जो कोए इन दोनुआं के मित्तर-परेम की बात सुणता उससै नैं अचम्भा होँदा ।

एक बर राज्जा परदेसी आपणे मंतरी चित्त तै बोल्या, “मैं न्यूं चाहूं सूं अक तू म्हारी ओड़ तै म्हाराज जितसतरु तै कोए चीज भेंट करूया । उसके राज में एक तै एक ग्यानी-ध्यानी रूहें सैं । उनके धोरै थोड़े दन टैर कै राजनीती पढ़ ले ।” राज्जा का हुकम सुण कै मंतरी कुणाल देस कान्नी चाल पड़्या ।

ओड़ै पहुँच कै ओ राज्जा तै मिल्या । उस तै राज्जा परदेसी का संदेस सुणाया । कीमती चीज भेंट करी । राज्जा नैं मंतरी के ठहरण का इंतजाम करा दिया ।

एक दन चित्त नैं बेरा पाट्या, भगवान पारस नाथ की परम्परा के ज्ञानी अचार्य सरमण केस्सी ओड़ै आण आले सैं । उनके आण का टैम भी आ गया । जिसनैं भी खबर सुणी, ओ-ए अचार्य केस्सी के दरसनां

खात्तर बेचैन हो गया। चित्त भी उनके दरसन करण चाल पड़्या। उनके धोरै पहुँच्या। हज्जारां की तदाद मैं लोग कटूठे हो रहे थे। उनकी मीटूठी बाणी सुण कै मंतरी चित्त पै घणा-ए असर होया।


बस! उसै तैम चित्त नै अचार्य केस्सी तै धरेसत (सरावग) धरम के बारां बरत ले लिए। ओ नित्त-नेम उनकी बाणी सुणता। ग्यान की बात बूझता। अचार्य जी की बाणी तै उसके जीण का तरीका बदल गया।


एक दन चित्त नैं अचार्य केस्सी तै कही – कदे म्हारे केकय देस की राजधानी स्वेताम्बका नगरी मैं भी पधारण की किरपा करो। अचार्य जी चुप रहे। चित्त नैं कई बर बिनती करी। अचार्य जी फेर भी बोल-बाले उसके कान्नीं देखदे रहे। चित्त समझ गया, अचार्य केस्सी राज्जा परदेसी के बुरे बरताव नै जाणैं सैं। वे कोन्यां चाहते अक घमण्ड मैं चूर परदेसी धरम की अर संघ की बेसती करै।

चित्त स्वेताम्बिका नगरी मैं उलटा आग्या। ओ चाहवै था – राज्जा परदेसी एक बर.....बस एक बर अचार्य केस्सी के दरसन कर ले। के बेरा उसकी ज्यंदगी बदल ज्या।

संजोग इसा होया, एक बर घूमते-टहलते अचार्य केस्सी स्वेताम्बका नगरी मैं आ गे। मंतरी नैं बेरा पाट्या, ओ जिब्बै उनकी सेवा मैं हाज्जर हो गया। उस नैं मुनियां के ठैरण का आच्छा एंतजाम करा दिया। आप भी उनकी सेवा मैं लाग्या रहंदा। उनके दरसनां खात्तर लोग्गां की भीड़ जाग्गी रहंदी।

मंतरी चित्त नैं सोच्ची, किस्से तरियां राज्जा परदेसी नै भी अचार्य जी तौरै ले चालणा चाहिए। फेर उसनैं एक तरकीब सोच्ची।





एक दिन चित्त नै राज्जा तै कही, “म्हाराज! थोड़े दिन पहल्यां घणे-ए बढिया घोड़े मोल लिए थे। थम उन नै देख ल्यो तै बढिया रूहै।” राज्जा घोड़े देखण नै राज्जी हो गया। जिब्बै-ए मंतरी गेल्यां चाल पड़्या। मंतरी उस नै मिरग बन कान्नीं ले गया। ओड़ै अचार्य केस्सी का धरम-बखाण होण लाग रूह्या था।

यो देख कै राज्जा चौक्या। बोल्या, “आड़ै कित ली आया मन्नै? चाल.... तावला चाल आड़े तै।”

राज्जा अर मंतरी चाल पड़े। माड़ी-सी दूर जा कै राज्जा नै घोड़ा रोक दिया। कहण लाग्या, “मेरा आगै जाण नै जी-ए कोन्यां करदा। मन्नै तै इसके मिट्ठे बोल याद आवैं सैं। बेरा ना इस सादूधू नै मेरे पै के जादू कर दिया! इस तै मिल्लण का जी करण लाग्या। मन्नै तै यो पहोंच्या होया सादूधू लाग्गै सै।”

मंतरी न्यूं सुण कै राज्जी हो गया। सोच्ची, राज्जा के बिचार ईब बदलण आले सैं। ओ आपणी सकीम की कामयाबी पै भित्तर-ए-भित्तर राज्जी होण लाग रूह्या था।

दोन्नूं अचार्य केस्सी की सभा में गए। राज्जा की निग्हा अचार्य केस्सी कान्नीं चुम्बक की तरियां खिंच गी। राज्जा नै सुणी- ‘यो संसार तै झूठ्ठा दिखावा सै। असली तै आतमा सै जिसका ग्यान लेणा जरूरी सै।’

बखाण पूरा होया। राज्जा परदेसी नास्तक था। उसके जी में आतमा-परमात्मा, लोक-परलोक, पुनर जनम, पाप-पुन्न, धरम के बारे में घणे-ए सुआल थे। उसनै अचार्य केस्सी तै उनका जुआब बूझ्या।

अचार्य केस्सी सामी ने राज्जा तैं सारी बात खोल-खोल कै सिमझाई।

घणी बात के, राज्जा का पेड़ा भर गया। फेर भावना में भर के राज्जा बोल्या, “भंते! मन्ने आपणी सरण में ले ल्यो।”

अचार्य केस्सी तै राज्जा नै बारा बरत लिए। ओ महलां में उलटा आ गया। राणी नै देख्या तो हैरान रह गी। उसनै यो सब किमै आच्छा कोन्नीं लाग्या।

परदेसी नै चाही अक उसकी राणी भी अचार्य जी धोरै चाल्लै अर धरम की दिक्सा ले पर वा ना मान्नी। सराब पीणा अर मांस खाणा उन्नै घणा भावै था। वा चाहवै थी, राज्जा भी न्युं-ए करै। परदेसी के धरमात्मा बणन तै वा भित्तर-ए-भित्तर घणी जलै थी। एक दन उसनै राज्जा तै मारण की सोच्ची। धोके तै उसनै राज्जा तै जहर दे दिया।

राज्जा नै राणी पै छोह कोन्यां करूया। इस बात तै उसका बिराग और भी घणा हो गया। ओ पौसधसाला में चल्या गया। राग-द्वेस तै छूट के ओड़ै-ए धरम-ध्यान में लाग गया। मरें पाछै ओ देव बण्या।

भूंडे अर करड़े बिचारां आला राज्जा भी सादूधू के सतसंग तै कितणी सहन करण आला अर कितणी दया करण आला बण गया था!

□□

भगवान का ध्यान

चम्पा नगरी में एक सेट रहया करता। उसका नां था— अरहन्नक। अरहन्नक आपणा पीसा समाज की भलाई में खरच करूया करै था। ओ जैन धरम में सरधा राक्खै था। नित-नेम करूया करै था। नगरी का धन्ना सेट हो कै भी, उसमें रस्ती-भर भी घमण्ड ना था।

एक बर अरहन्नक सेट ब्योपार करण खात्तर चाल पड़ूया। उसकी गेल्यां घणे-ए मित्तर-प्यारे अर ढब्बी भी चाल पड़े। दूर का जाणा था अर समंदर का सफर था। कई दिन सफर में लागणे थे। सफर सरु हो गया। दो-चार दन तै सुथरी ढाल बीत गे। कोए बिघन कोन्या पड़ूया। फेर एक दन तुफान आ गया। नाव ऊंची-ऊंची खतरनाक लहरां पै ऊपर-तलै होण लाग गी। चारुं कान्नीं गाड़ुढा अंधेरा हो गया।

सब नै लाग्या अक ईब तै मरण-घाट पहुँच लिए। सारे आपणे-आपणे देवां नैं याद करण लाग गे।

नाव में एक आदमी ईसा था जिनैं मरण का माड़ा-मोटूटा भी डर भै ना था। ओ सान्ती तै बैठूया था। इंग्घै-उंग्घै ना लखावै था। ओ था— सेट अरहन्नक! उस नैं मन में यो संकल्प कर लिया अक या मुसीबत टलैगी तै मैं रोटूटी पाणी ल्यूंगा अर नहीं तै चारुं अहारां का त्याग सै। न्यूं सोच कै ओ भगवान का ध्यान करण लाग गया।

माड़ी वार पाछे उसनै एक अवाज सुणाई पड़ी- ‘तू इस धरम नैं छोड दे। नहीं तै तेरी नाव इब्बै-ए समंदर में डूब ज्यागी। तू अर तेरे सारे

भित्तर-प्यारे डूब कै मर ज्यांगे ।’

अरहन्नक बोल-बाला धरम-ध्यान में लाग्या रह्या । फेर अवाज आई— ‘ मैं तन्नै घणा-ए धन द्यूंगा । बस, एक बर तू धरम नै झूट्टा कह दे । माल्ला-माल हो ज्यागा ।’

माल्ला-माल होण की खबर सुण कै भी अरहन्नक आपणे धरम तै माड़ा-सा भी कोन्यां डिग्या । धरम-ध्यान में लाग्या रह्या ।

नाव में बैटूटे होए ओर लोग जो डर की मारी थर-थर कांपै थे, बोल्ले, “रै सेट्टां कै सेट अरहन्नक! तू हात्थां तै यो मोक्का मत न्या लिकड़ण दे । दखे जान भी बच्चैगी अर धन भी मिल्लैगा । इस धरम नै छोड दे ।”

अरहन्नक ईब भी चुप था । ना उसनै डर लाग्गै था अर ना-ए धन के लोभ में ओ मर्या जा था । ओ तै बस, ध्यान-ए करता रह्या । घणी बार ताई न्युं-ए होंदी रही । नाव में सुआर डरे होए लोग्गां की सिमझ में या बात आई-ए कोन्यां अक अरहन्नक म्हारी चिन्ता क्यूं ना करदा । माड़ी वार ओर बीत गी ।

सबनै देख्या अक एक देव अरहन्नक के सामीं हाथ जोड़े खड्ग्या सै । अरहन्नक नै आंख खोल्ली । होट्टां भित्तर हांस्या । बूझ्झी, “हे देव! थम कुण सो? आड़ै आण का कसट क्यूंकर कर्या?”

देव नै कही अक “इन्दर म्हाराज नै देवां की सभा में थारी घणी बडाई करी थी । पर, मेरा जी कोन्यां टुक्या । थारा हितान लेण में आड़ै आया था । समंदरी तूफान कुछ ना था, वा तै मेरी-ए माया थी । इंदर

